

Imam Husain Radhi Allahu anho Ka Ta'aruf

Naam-e-Mubarak: Husain.Kunniyat:Abu'Abdullah.Laqab:Raihanatur Rasool.

Walid ka naam: Maula Ali Radhi allaho anho.

Walida ka naam: Hazrat-e-Fatima radhi allaho anha.

Nasab Naama: Husain bin Ali bin Abu Talib bin Abdul Muttalib bin Hashim bin Abd-e-Manaf Qarshi hashemi.

Taarikh-e-Paida'ish:3,Shaban 4,Hijri ko Madina sharif me paida hue.

Biwiyan: (1) Shahar bano.(2) Umme Rubab.(3) Umme Laila.(4) Umme Ishaq.

Aulad-e-Mubarak: (1) Ali Akbar.(2) Ali.Jo Zainul Aabedin se mash'hoor hain.(3) Ali Asgar.(4)Sakina.(5) Fatima Sugra

Taarikh-e-Shahadat: 10 Muharramul Haraam 61 Hijri, ko Juma ke din Iraaq me Karbala ke maqam par deen ke dushmano se haq ki khaatir ladte hue shaheed hue.

Faza'il-o-Manaqib:Hadees No.1: Hazrat-e-Abu'Saeed Khudri radhi allaho anho bayan karte hain ki Huzur Nabi kareem Sallallaho alaihe wasallam ne farmaya ki : Hasan aur Husain jannati jawano ke sardaar hain.(Tirmizi ,Hadees No.3768)

Hadees No.2: Hazrat-e-Anas radhi allaho anho bayan karte hain ki Huzur Sallallaho alaihe wasallam se puchha gaya ki Ya Rasoolallah Sallallaho alaihe wasallam! Aap ke Ahl-e-bait mein aap ke nazdik sab se ziyadah pyara kaun hai? To Aap Sallallaho alaihe wasallam ne farmaya ki Hasan aur Husain.Raawi bayan karte hain ki Aap Sallallaho alaihe wasallam Hazrat-e-Fatima radhi allaho anha ke ghar jaate aur un se kahte ki mere dono beto ko bulao.(Jab imam Hasan aur imam Husain radhi allaho anhuma ko laaya jaata) To Aap Sallallaho

alaihe wasallam dono ko sunghte aur dono ko apne saath chimta lete.(Tirmizi,Hadees No.3775)

Hadees No.3: Hazrat-e-Yala bin Murrah radhi allaho anho bayan karte hain ki ham log Huzur Sallallaho alaihe wasallam ke saath ek dawat khaane ke liye nikle. Huzur Sallallaho alaihe wasallam ne Imam Husain radhi allaho anho ko gali mein khelte hue dekha To Aap Sallallaho alaihe wasallam ham logo se aage badh gaye aur apne dono haatho ko phaila diya.Imam Husain radhi allaho anho idhar udhar daurne lage aur Huzur Sallallaho alaihe wasallam un ko hansaate rahe yahan tak ki Aap Sallallaho alaihe wasallam ne un ko pakad liya.Phir Aap Sallallaho alaihe wasallam ne apna ek haath un ki thori ke niche aur dusara haath sar par rakh kar unhe chuma aur irshad farmaya ki: Husain mujh se hai aur main Husain se hon.Allah us se mohabbat kare jo Husain se mohabbat karta hai.(Ibn-e-Maja,Hadees No.144)

Hadees No.4: Hazrat-e-Ummul Fazl bint-e-Haris bayan karti hain ki Main Huzur Sallallaho alaihe wasallam ke paas gayi aur arz kiya ki Ya Rasoolallah Sallallaho alaihe wasallam! Main raat ko ek bahut hi galat khaab dekha hai.Huzur Sallallaho alaihe wasallam ne farmaya ki:Kya dekhi ho? Hazrat-e-Ummul Fazl kahti hain ki main ne kaha: Ya Rasoolallah Sallallaho alaihe wasallam!Woh bahut hi khatarnaak khaab tha.Aap Sallallaho alaihe wasallam ne farmaya ki tum ne dekha kya hai? To main ne kaha ki Ya Rasoolallah Sallallaho alaihe wasallam main ne ye dekha ki Aap ke jism-e-mubarak ka ek tukda kaat kar meri god mein rakh diya gaya.To Huzur Sallallaho alaihe wasallam ne farmaya ki tum ne achha khaab dekha hai.In sha allah Fatima ke yahan ek ladka paida hoga jo tumhari god mein rakha jaaega. Hazrat-e-Ummul Fazl kahti hain ki:Huzur Sallallaho alaihe wasallam ke farmane ke mutabiq hazrat-e-Imam Husain paida hue aur meri god mein rakhe gaye.Phir ek din main Huzur Sallallaho alaihe wasallam ke paas gayi to dekha ki Huzur Sallallaho alaihe wasallam un ko apni god mein rakhe hue hain aur Aap Sallallaho alaihe wasallam ki aankho se aansu tapak rahe hain.Main ne arz kiya Ya

Rasoolallah Sallalloho alaihe wasallam! Mere maa baap aap par Qurban aap ko kya hua hai? Huzur Sallalloho alaihe wasallam ne farmaya ki Mere paas Jibrail aae aur mujhe bataya ki meri ummat ke log mere is bete ko qatal kar denge. Main ne puchha is bete ko? Huzur ne farmaya ki Haan, Is bete ko. Aur Jibrail ne mujhe us ki shahadat ki jagah ki laal mitti bhi laa kar diye. (Al-Mustadrak, Hadees No.4818)

Hadees No.5: Hazrat-e-Ibne Abbas radhi allaho anho bayan karte hain ki Hame aur ahl-e-bait ko is baare me koi shak nahi tha ki Husain bin Ali radhi allaho anhuma Karbala me shaheed kiye jaaenge.

(Al-Mustadrak, Hadees No.4826)

DAWAT-E-QURAN

Educational And Welfare Trust
Khidderpore, Kolkata-23